



**Fluregn Fravi, mainagestiu da Gastro Grischun, ha preschentà a deputadas e deputads da la pld l'iniziativa da la gastronomia.**

FOTO G. N. STGIER

# Cuntrari a la partida svizra

Partida liberaldemocratica dal Grischun

DA GION NUTEGN STGIER / ANR

■ **Nagin cuntercandidat per Bruno W. Claus per l'uffizi da president ed uschia è il giurist da Cuira vegni elegì sco successur dal president partent Michael Pfäffli da San Murezzan. Ina surpraisa è segir ch'ils delegads han decidì da sustegnair l'iniziativa da la gastronomia.** A Domat ha *Michael Pfäffli*, dapi sis onns president chantunal da la Partida liberaldemocratica (pld), manà sia davosa radunanza da delegads sco parsura. In dals puncts culminants saja per el cunzunt stà il 2010 cun esser la pld la clera victura da las elecziuns chantunalas. Dapi quel success saja la fracziun dals liberals la pli gronda en il parlament da noss chantun ed in fatg cunzunt plaschaivel saja bain che suenter las elecziuns dal davos matg saja quai anc adina il cas. En quels sis onns sco president haja el gi l'onur da manar 23 radunanzas da delegads e 49 sedutas, retschet bunamain 12 000 mails, gi 2400 telefons, fatg be cun il tren passa 800 uras e cun l'auto 13 000 km.

## Dus giadas gea ed ina giada na

En 20 dis decida il suveran svizzer pertugant l'iniziativa da la Gastro Suisse, l'uniun dals ustiers svizzers. Cun l'iniziativa dal pievel «Basta cun la taglia sin la plivalur discriminanta per la gastronomia» vulan ils ustiers da noss pajais meglras cundiziuns. Ils ustiers pajan 8% taglia sin la plivalur sche in giast consumescha en restaurant, dentant in kiosk saja be 2,5% sch'el venda sias victualias. Cun l'iniziativa duai vegnir garantì in tractament egual dals manaschis da gastronomia e dals uschenumnads «take aways». A Domat ha *Fluregn Fravi*, il mainagestiu da Gastro Grischun, preschentà las finamiras da l'iniziativa. Discurrì ferm per in sustegn da l'iniziativa ha lura cunzunt *Urs Marti*, il president da la citad da Cuira. Decidì han delegadas e delegads lura da sustegnair l'iniziativa e quai cun 49 GEA tar 20 NA. La pld svizra aveva dentant proponì da refusar l'iniziativa. Refusà han lura ils preschents l'iniziativa dal pievel «Per ina cassa da malsaus publica» e quai senza ina cuntervusch. Ils liberals grischuns vulan er introduir la nova lescha davart la re-

furma da la golvaziun da finanzas en il Grischun ed er qua è il resultat cler cun 63 vuschs tar 10 vuschs.

## Anc nagins nums da candidats

Il nov president da la pld grischuna ha ditg il suandant: «La pld duai er en l'avegnir restar ina partida da l'economia, dentant er ina partida dal mastergn.» Sia finamira saja dentant er da lavurar èn in team e da mantegnair il dumber dals deputads e da las deputadas. Ina vaira sfida saja però er dad avair en in onn puspè in cusseglier naziunal en il parlament federal. Anc saja dentant memia baud da publitgar nums. Il pli tard a la fin da quest onn vegnia la pld a preschentar candidats e candidatas. La pld sappia sa posizunar cleramain sco partida burgaisa e saja uschia er in partenari interessant per autras partidas, gist en connex cun las elecziuns naziunalas da l'onni proxim. Cun tge partidas che la pld vegnia a far ina colliaziun da glistas saja da preschent betg anc public ed er betg en la fasa iniziala, ha ditg *Bruno W. Claus*, il nov president dals liberals da noss chantun.